

Quant gudognan noss parlamentararis a Berna?

Retschertga scientifica

DA LUCAS DEPLAZES / ANR

■ **L'Universitad da Geneva ha intercurri las diversas indemnizaziuns dals parlamentararis federalis. En media retschaiva in cusseglier naziunal ina indemnizaziun da 91 900 francs ed in cusseglier dals chantuns 92 200 francs.** Sin incumbensa da la delegaziun da l'assemblea federala han elavurà spezialists da l'Universitad da Geneva in studi scientific davart las diversas indemnizaziuns dals parlamentararis federalis durant ils onns 2011–2015. Ier han ils analists da Geneva preschentà lur studi a las medias a Berna. Mintga parlamentarari haja retschet in questiuari cun dumondas concretas davart temp da lavur ed indemnizaziuns. Circa la mesadad dals parlamentararis ha emplenì e returnà il palpìri cun las infurmaziuns persunalas davart il temp impundi per las quatter sessiuns, plinavant per la lavur en las cumissiuns, delegaziuns e fracziuns. Lavur e preschientscha per contacts publics, per sa preschentar davant votantas e votants, davant las medias e la participaziun ad occurrenzas da las partidas e campagnas en connex cun las votaziuns na vegnan betg indemnizadas. Tut en tut paja la confederaziun 37,4 milliuns francs l'onn; da quella summa van otg milliuns francs als commembers dal cussegl dals

chantuns e 29,4 als parlamentararis dal cussegl naziunal.

Cussegl naziunal

En il cussegl naziunal impunda il singul parlamentarari var 50 procent dal temp da lavur per sesidas e preparaziuns. Vegnan prendidas en consideraziun tut las lavurs parlamentararas cuntanscha in mandat fin 87 procent. En media retschaiva in cusseglier naziunal 91 900 francs l'onn, quai che munta 93 francs l'ura. Per tgi che occupescha ina forza da lavur persunala sa reducescha il gudogn per 28 000 francs respectiv 65 francs l'ura.

Cussegl dals chantuns

En il cussegl dals chantuns è la lavur pli intensiva. La chombra pitschna cun 46 commembers sto tractar las medemas fatschentas sco il cussegl naziunal. Perquai fan part blers commem-

bers da pliras cumissiuns, quai che munta dapli temp. In cusseglier dals chantuns retira ina indemnizaziun mediana da 92 200 francs l'onn, quai che munta 96 francs l'ura u 67 francs per tgi che fa diever d'ina forza da lavur persunala. Per tge motiv che il temp da lavur munta mo a 71 pertschient n'han ils analists dentant betg pudì declerar.

Grondas differenzas

Tar las indicaziuns sura numnadas ston ins resguardar che quella inditgeschan la paja mediana. Tar ils singuls parlamentararis e parlamentararas existan considerablas differenzas, tut tenor lur engaschis en las cumissiuns e delegaziuns. La lavur parlamentaria lubescha per regl ina occupaziun professiunala parziala supplementara.

Cumparegliaziun cun l'economia privata

Il experts han fatg diversas cumparegliaziuns cun l'economia privata che è bler pli libra da fixar las singulas pajas sin il sectur da cader. Il analists han cità in exempel d'ina gestiunaria en ina interpresa mesauna che vegn sin ina paja mensila da 14 440 francs, quai che dat ina summa annuala da 173 280 francs e correspunda er ad in funcziunari da cader en il sectur mez tar la confederaziun.

Indemnizaziuns

Diaria (Taggeld)	440 fr.
Preparaziun	26 000 fr.
Sustegn ed expensas	33 000 fr.
Per tschaveras	115 fr.
Pernottaziun	180 fr.
Indemnis. per presidis	440 fr.
Abunnament general	4880 fr.

Dapli infurmaziuns sut:
www.parlament.ch



Commembers dal cussegl naziunal gudognan sut il stritg 79 francs l'ura per lavur parlamentara. En il cussegl dals chantuns èsi 76 francs.